

[Augsburg], 11. Januar 1553

An Joachim Camerarius d. Ä.

BSB, Clm 10370, Nr. 245.

Druck: Hartig S. 225f. (Auszüge).

S. D. Omnino statueram cum è Gallijs reuersus essem, in Misniam proficisci, quò liberalibus D. Carolouicij literis inuitabar. Sed quia consilium illud meum et Carolouicij peregrinationibus et Parthenopaea obsidione differebatur: substi nescio quo fato Augustae, et praeter expectationem meam, in familiam Fuggeranam, a qua me negligi putabam, sum receptus: in eaqué alterum iam annum viuo, communi victu cum D. Ioanne Iacobo Demosthenis mei patrono fruens: qui sanè splendor non paruus habetur. Occupatissimus hactenus fui inscribendis et digerendis copiosiss[imae] Bibliothecae libris. eoqúe labore nunc defunctus propemodum, alterum suscipio non multò leuiores eos conquirendi libros quos adhuc desideramus. Stipendum nullum mihi constitutum est, nisi quod per Carinum mihi promisit herus, se acturum esse mecum liberaliter. Eam liberalitatem vt definiret tandem, nuper petij, quod se facturum recepi, neque ego nunc in pompa nuptiarum patruelis vrgere audeo. Prae se tulit hactenus erga me vnà cum fratribus omnibus singularem benevolentiam, de qua concepta spes si me fefellerit: quam male mihi perierint aerumnae et horae optimae totius biennij, quo ad studia vix respicere licuit? Et tamen eò sum redactus, ut penè necesse habeam, etsi mecum iniquius egerit, boni consulere. Nam quò me conuertam? in Academiam aliquam? at nec facile honestus ibi locus mihi continget, et vt contingat, aestuabo perpetuò οὐ μουσικὸς ὃν ἐν πολλοῖσι λέγειν, καὶ πρὸς τὰς ἐπιδειξεῖς. In ludum literarium? at labores tantos si tolerare potuisse, iam olim certam et mediocrem sedem habuisse. Restare igitur vt in hac honestissima et humanissima et literarum non tantum amante, sed etiam literata domo aetatem exigam, si non vt volo, at vt potero. Sin expellar (οἱ γὰρ παρὰ τοῖς τυράννοις δυνάμενοι ταῖς τῶν ἀριθμητικῶν ἐοίκασι ψήφοις) idqúe propediem me cognitum spero: te oro, vt si quam aptam mihi conditionem cognoueris, operam des, vt ea mihi contingat. Vxorem me nunquam ducturum puto, sed nihilominus mihi opus est liberali stipendio propter valetudinem tenuissimam, quae delicatiorem vitam flagitat, et pharmacis quasi tibicinibus subinde fulcienda est. ad haec ego κερδαίνειν καὶ φείδεσθαι οὐ δεινός εἰμι φύσει ἀλλὰ χρημάτων προετικώτερος τοῦ δέοντος. Sed huic vitio moderari vtamque possum, ac non tam mea causa quam sororum et fratris, qui Nordlingae nunc degit ἀπρακτός τε καὶ ἀχρήματος. εὐπορίας τινὸς ἐπιθυμῶ, τοῦ κακείνοις συνευπορεῖν τὶ. Verùm hoc optare potius est, quam deliberare. quod te pro tua humanitate sic accipere velim, vt ne me putas ἡ τῶν ἀδυνάτων ἐφίεσθαι, ἡ τῶν εὐδεχομένων καταφρονεῖν. hoc tantum significare volui, nisi alibi honesta conditio possit contingere, praestare hic victimum et amictum liberalem vel sine pecunia boni consulere. Et haec de rebus meis vt voluisti, quas tibi curae esse et gaudeo et gratiam maximam habeo. Cyprianus suas tabulas prima quaque occasione ad te missurum recepit. Editae sunt Augustae sed adhuc apud autorem delitescunt propter turbas temporum. Puto tamen te apud D. Erasmus Ebnerum eas visurum, cui iam pridem eas misit. Adiecit autem Cyprianus Regiomontani tabulis methodum procedendi in directionibus, exemplis illustratam et tabulas positionum 54. et ascensionum obliquarum: quae cuiusmodi sint, legendo breui cognosces. Quanta cum molestia, tua familia domo absit, facile intelligo, ac te commodo tuo Norimbergae perpetuam habere sedem et tua et mea causa optarim: vt et tu in humaniore vrbe habitares, et ego saepius ad te scribendi occasionem haberem, quem tuo merito et amo et

veneror, et omnibus officijs pro tenuitate mea colere nunquam desistam. Vale. 3 idus Ianuarias Anno 1553.

Hiero[nymus] Wolfius.